

台

學

統

台學統卷二十九

黃巖王 蔡旗

吳興劉承幹校

性理之學十七 明儒三

忠節王靜學先生叔英

明史列傳王叔英字原采黃巖人洪武中與楊大中葉見泰方孝孺林右竝徵至叔英固辭歸二十年以薦爲仙居訓導改德安教授遷漢陽知縣多惠政歲旱絕食以禱立應建文時召爲翰林脩撰上資治八策曰務問學謹好惡辨邪正納諫諍審才否慎刑罰明利害定法制皆援證古今可見之行事又曰太祖除姦剔穢抑強

鋤梗如醫去病如農去草去病急或傷體膚去草嚴或傷禾稼病去則宜調燮其血氣草去則宜培養其根苗帝嘉納之燕兵至淮奉詔募兵行至廣德京城不守會齊泰來奔叔英謂泰貳心欲執之泰告以故乃相持慟哭其圖後舉已知事不可爲沐浴更衣冠書絕命詞藏衣裾閒自經於元妙觀銀杏樹下天台道士盛希年葬之城西五里其詞曰人生穹壤閒忠孝貴克全嗟予事君父自省多過愆有志未及竟奇疾忽見纏肥甘空在案對之不下咽意者造化神有命歸九泉嘗念夷與齊餓死首陽巔周粟豈不佳所見良獨偏高蹤渺難繼偶爾無足傳千秋史官筆慎勿稱希賢又題其案曰生旣

已矣未有補於當時死亦徒然庶無慚於後世燕王稱
帝陳瑛簿錄其家妻金氏自經死二女下錦衣獄赴井
死叔英與孝孺友善以道義相切劘建文初孝孺欲行
井田叔英貽書曰凡人有才固難能用其才尤難子房
於漢高能用其才者也賈誼於漢文不能用其才者也
子房察高帝可行而言故高帝用之一時受其利雖親
如樊鄴信如平勃任如蕭曹莫得閒焉賈生不察而易
言且言之太過故絳灌之屬得以短之方今明良相值
千載一時但事有行於古亦可行於今者夏時周冕之
類是也有行於古不可行於今者井田封建之類是也
可行者行則人之從之也易而民樂其利難行而行則

從之也難而民受其惠時并田雖不行然孝孺卒用周
官更易制度無濟實事爲燕王藉口論者服叔英之識
而惜孝孺不能用其言也

儒林錄王原采先生名叔英字原采浙江黃巖人初冒
母陳姓後乃復王篤志力學洪武中同方正學楊大中
葉見泰林佑並徵至京固辭還鄉因與正學友善相切
劘賢名籍甚二十年薦授僊居訓導三十年改淮安府
學考滿擢知漢陽縣著惠政遇旱禱雨與神約三日不
雨至四日則自減一食五日減二食至六日不雨當絕
食飲水以俟神之顯戮不忍見斯民飢死而已獨生是
夕卽大雨連三日不止慮其爲潦也復禱晴於神如前

誓是夕果開霽邑人大悅建文元年正學柄用欲復井田先生貽書力阻之略云方今明良相遇千載一時但天下之事固有行於古亦可行於今者如夏時周冕之類是也亦有行於古而難行於今者如井田封建之類是也君子之用世所以貴乎得時措之宜也尋召爲翰林修撰上資治八策曰務學問謹好惡辯邪正納諫諍審材否慎刑賞明利害定法制而卒論創守相成寬猛迭濟之宜上嘉納是時朝議削宗藩急紛更先生上疏曰太祖高皇帝除姦剔穢抑強鋤梗如醫者之去疾農夫之去草然急於去病或傷其元氣嚴於去草或損其禾稼是故體膚病去則宜調養其血氣禾稼草去則宜

培養其根苗上不省靖難兵起先生奉命募兵廣德未幾燕兵渡江郡人皆散去兵部尙書齊泰來奔先生疑其貳志令州人執之旣至泰告以故乃釋泰圖再舉已而臥病僧寺知事不可爲乃起沐浴具衣冠賦絕命詞復書於案曰生旣久矣竟何補於當時死亦徒然庶無慚於後世遂自經死時年未四十死後妻金死於獄二女死於井弟元默捕斬剝屍幼子遣戍大同天台道士謝希年受遺囑葬先生於廣德城西五里祠山之麓先生自少以孝行稱旣出仕好獎拔善類嘗表薦楊士奇於朝士奇由此召用正統中士奇題碣曰翰林修撰王公原采之墓而祭以文略曰先生之學聖賢是師先生

之行綱常允持先生之心金石其貞先生之道霜雪其
明成化閒莆田周瑛守廣德嘉靖初安福鄒守益謫州
判皆修其墓崇禎末補諡文忠

黃綰王靜學先生傳先生姓王氏諱元彩字叔英

萊按諱字

易號靜學黃巖人也少孤因母嫁陳氏故或稱陳元彩

實王氏也居亭嶺今屬太平縣洪武中爲仙居教諭陞
漢陽知縣革除初以薦爲翰林修撰與正學方公先後
被召或云正學薦之嘗上資治八策曰務學問曰謹好
惡曰辨邪正曰納諫諍曰審才否曰慎刑賞曰明利害
曰定法制皆當時急務又曰太祖皇帝除姦剔穢抑鋤
強梗若醫之去疾農之去草然急於去疾或傷其體膚

嚴於去草或損於禾稼體膚疾去宜養其血氣禾稼草
去宜培其根苗又論行限田法如此者數千百言初在
漢陽時聞正學先生被召貽書曰子房於高帝察可行
而言故高帝用之一時受其利雖親如樊呂信如陵勃
狂如蕭何不得閒焉此子房能用其才也賈生於文帝
不察而易言且言之太過故絳灌之屬得以短之此賈
生不能用其才也皆規風正學甚至識者以先生所見
又踰於人矣比入朝與正學相期身致三代之治未幾
太宗皇帝入繼大統先生與正學皆死之時先生方募
兵廣德將進適尙書齊泰來奔知事不可爲遂止退館
於桐山道士以死自誓此死作絕命辭有曰嘗聞夷與

齊餓死首陽巔周粟豈不佳所見良獨偏又書案曰生
旣久矣媿無補於當時死亦徒然庶無慚於後世以辭
裹金置道士所治棺中夜起沐浴冠帶經於庭之柏月
明大吹隸人啟戶視之先生死矣道士遂以其棺斂之
爲葬於橫山楊文貞公士奇過廣德題其墓曰嗚呼修
撰王公之墓道士姓盛名希年亦黃巖人義士也隸人
上其狀與方先生死先後日耳邏捕其家妻金氏死於
獄二女死於井殉先生云余聞諸父老云楊文貞公布
衣時主塾漢陽村落中先生行部過之聞讀書聲曰兵
革之後久不聞此矣異之人視焉文貞避去見案上詩
文一編文貞作也爲題曰此公輔器也何避爲邀致薦

之嘗讀文貞他文有曰子素與先生相知審理之除實其所薦又文貞與人手簡曰昨得王大尹文字讀之說理甚精且有法度愈讀益有味羈旅中何幸遇也王尹者先生也又東里小傳曰文貞少遊湖湘漢陽府學聘爲訓導不就則父老所傳及文與簡所云蓋漢陽時事府學之聘亦先生薦之耳至入朝又薦之又聞云鄉人張璣者嘗遊先生之門正統間歲貢入太學文貞詢其後鄉吏以璣見公待之甚厚後爲定涿二州同知初先生有幼子名某謫戍大同因璣語知文貞以百金與鄉人孟範訪得之又以金若干遺揚州教諭某人使教誨之久而學不成返諸文貞又益金若干再使教之卒無

成文貞曰奈何抱之痛哭廼復與金若干遺之遂不知所終孟範後爲治中云亦云文貞薦之嗚呼先生不負國文貞亦不負先生矣弟元默變姓名匿於京城商旅中會鄉有金寬者識之告太宗捕而斬之劉其屍今其後亦不聞有顯者先生所著有靜學集傳於世其文章有原本知時達勢用世儒也

論曰先生與正學先生生當興運懷經綸之志然卒皆不究厥志殉義以死悲夫嘗聞太孫聰明好古篤信儒術志欲以周官致治竟失天下遁死果天命然乎抑人事也余於是益感君臣相遇之難又信祖法之未可以輕議也讀先生貽正學書爲之三復流涕者久之嗚呼

識慮遠哉

忠節翰林修撰靜學王先生行實

太平葉良佩撰
靜學文集附錄

先生自幼篤學力行常以古賢人君子自期洪武初以薦辟任仙居訓導改德安任滿陞漢陽令遇旱絕粒禱雨有惠政及民革除年方正學先生召爲講官銳志議行井田公移書勸止之已而公亦召入爲翰林修撰乃上資治八策曰務學問曰公好惡曰辨邪正曰納諫諍曰審才否曰慎賞刑曰明利害曰定法制皆援古證今鑿鑿可行且曰高皇帝除邪剔穢抑強扶弱如醫者之治疾農夫之去草夫急於去疾則或傷其體膚嚴於去草則或損其禾稼固自然之勢也然體膚疾去之餘則

宜調燮其血氣禾稼草去之後則宜培養其根苗亦自然之理也識者知其爲經濟遠略云永樂初靖難師起先生奉旨募兵廣德無何而成祖渡江兵部尙書齊泰來奔先生曰泰貳矣令州人執之泰至告之故乃釋泰圖再舉已而知事不可爲於是沐浴具衣冠書絕命詞并自贊於案而死臨終時以書抵祠山道士盛希年曰可葬我祠山之麓卒收葬之希年本台人秉家爲祠山道士云尋有詔治姦黨夫人金氏瘐死獄中二女亦投井而逝或上其所賦詩上曰彼食其祿宜自盡厥心耳置不問楊文貞公士奇寔公所薦公旣沒文貞追題其墓曰嗚呼故翰林修撰王先生原采之墓申以言曰先

生學醅行正守道臣道終其身無一毫之苟又曰先生之心金石其貞先生之志霜雪其明論者稱爲口實成化中莆田周公瑛知廣德爲修其墓今嘉靖己亥曾侯才漢復請於司府乃建忠節祠贊宮之旁以祀先生復建貞烈祠以奉夫人金氏并二女焉時曾侯暨郡守南康周公遂請方伯霞山蔡先生爲之記

贊曰先生與正學方先生同志同道卒同死革除閒或問革除之死臣良佩曰靖難之仁博猶文考之有武王也死事之義貞猶牧誓之有夷齊也二者勢異而功同然則先生可無憾哉

欽定勝朝殉節諸臣錄修撰王叔英黃巖人募兵廣德

聞京城陷自經死妻金氏自經二女投井

見明史通鑑

忠節

忠節祠記

臨海蔡潮霞山撰

靜學文集附錄

嗚呼此吾鄉先哲修撰王先生祠也先生名叔英字原采別號靜學自少有氣節初本黃巖人今分隸太平洪武中爲漢陽令革除初召拜翰林修撰上資治八策皆經國遠猷切裨世政會靖難師起因募兵廣德知事不可爲乃沐浴具衣冠書絕命詞并自贊於案遂自縊以死時年未四十

按先生以洪武二十年春任仙居訓導其時年當三十餘矣越十六年壬午當

云年未五十耳四字誤也

祠山道士台人盛希年收葬祠山之麓尋

有詔治姦黨妻夫人金氏斃於獄二女投井而逝嗚呼

貞哉正統中少師楊文貞公士奇始表其墓旣而廣德
守莆田周公瑛大庾劉公節暨義士濮鉅相繼葺理塋
祠漸備世傳幽光備名臣諸錄及靜學東里諸文集具
載可考乃者太平令泰和會才漢秉義敦化遂旁求先
生遺裔樹立之恆念邑無特祠爲缺典議創興作適二
守南昌朱公世忠按部請允而贊其決焉乃卽校鄰隙
地作祠田忠節明先生近聖人之居無媿乎讀聖人之
書斯以風厲人人不徒便於展敬而已時復建貞烈祠
祀金氏夫人并二女孺會侯檄閭郡守南康周公議以
克協徵予爲之記嗟夫有天下之大故常與變也有綱
常之大故忠與邪也有一身之大故生與死也當夫聲

折江河勢崩雷電之際變斯極矣盡瘁報國蹙蹙靡騁
忠有餘而力不逮雖欲爲東海之蹈西山之殫勢有所
限而義且不可邪而生不若忠而死食焉不避其難固
其所也他復何爲哉於時台士立朝者一死於人一自
死之均一絕命之詞均一從容就義正學方公靜學王
公跡雖異而心無不同同一正氣之所爲也非其養之
素充講之素明安能處常變酌經權而光明俊偉之若
是耶迄今垂二百祀而始表揚於其鄉無乃有數存其
閒乎而後鄉人士仰忠節之祠而臣子有所法瞻貞烈
之祠而閭閻有所效典制具在非細故也爲此舉者其
敦本誠治者歟嘉羨太息之餘爲之秉筆而不辭仍載

先生絕命詞并贊語於碑陰使篤信好學之士有所攷云

祭王靜學先生文

楊士奇

維大明正統六年歲次辛酉八月朔十有六日己卯門
生廬陵楊士奇敬以清酌庶饁之儀致祭於故翰林修
撰靜學先生王公之靈曰嗚呼先生之學聖賢是師先
生之行綱常是持先生之心金石其貞先生之志霜雪
其明倏爾歸泉乘雲翩翩我懷先生崇山長川桐川之
藏既固且深薄陳觴豆神其來歆尚饗

修撰王公贊

謝鐸

尊鄉錄節要三

武王放伐微子以歸千載而下孰敢是非特立獨行惟

孤竹子不惑眾見百世以俟豈無周粟無原食薇乃甘
我餓以死惟義之耽昌黎有頌特筆莫繼我再拜公痛
哭流涕

遺書

靜學文集一卷 四庫全書總目明王叔英撰叔英名
原采以字行黃巖人洪武中與楊大中葉見泰方孝孺
林佑竝徵至叔英固辭還鄉後以薦官仙居訓導改德
安教授遷漢陽知縣建文時召爲翰林修撰燕兵至淮
奉詔募兵行至廣德會齊泰來奔知事不可爲乃書絕
命詞自經於元妙觀選捕其家妻金氏及二女并殉焉
事蹟具明史本傳乾隆四十一年 賜諡忠節史稱叔

英在建文朝嘗上資治八策又稱方孝孺欲行井田叔英貽之書曰事有行於古亦可行於今者夏時周冕之類是也有行於古而不可行於今者井田封建之類是也可行者行則人之從之也易而民受其利難行者行則人之從之也難而民受其患云云今是集三十篇僅存序記二體而所上八策及貽孝孺書竝無之按徐敬孚跋稱楊士奇嘗欲纂集叔英之文求無完本深悼惜之成化年有謝世修者欲募刻以廣其傳蓋搜葺重編非其舊本卷首林佑序作於洪武中者乃後人所錄入非卽爲此本作也叔英嘗自云趙孟之貴非所慕陶朱之富非所願使吾文如聖賢是吾心也今觀是集大抵

皆規樸昌黎稍失之拘而簡樸有度非漫無裁制者比
所存雖少已可以見其生平矣前有黃綰所爲傳稱其
文章有原本知時達勢爲用世之儒蓋不誣云

按靜學文集二卷初刻于成化壬辰邑人謝省爲
後序徐孚爲跋謝文肅赤城新志云靜學集黃巖王

叔英著有刻板蓋卽指此本也

衡守徐孚定之刻于衡州

再刻于

萬厯丙子知太平縣事翁仲益爲序益以漢陽祈雨

文三首及黃綰所爲傳三刻于

國朝康熙乙酉

至庚

寅始

刻成太平參將郭鎮邦爲序四刻于嘉慶甲子

江遷裔孫

王永等捐刻

邑人項調陽爲序補明利害策一首

資治

入策

之一及附弔謁詩七首彙復據赤城論諫錄補資治

策八首并序一首

明利害策已見項本

釐爲三卷而附序跋傳

記等十六首并附詩七首爲首末二卷計共五卷云

四庫所收蓋只上卷序記三十首而無下卷傳志書說等三十一首及詩十五首故無貽正學書也又以徐孚爲徐敬孚不知世修爲謝省之字皆似失考今與方正學書具在下卷又補資治八策於先生之文亦稍備矣光緒辛卯十一月九日邑後學王棻謹識

靜學齋文集序

臨海林右公輔撰

赤城後集三十二

天之與人富貴名壽皆不甚惜至於文章則甚惜之何也一代之興位列上公土封大國名滿天下而年至上

壽者不可指數而文章之士不過三數人三數人之中能使天下後世寶其文而傳之者無幾人以天下之大能者不過三數人以萬世之遠而傳之者又不過幾人非天所甚惜乎不然何生於世若是之寥寥也於乎我知之矣文章之士探造化之原窮聖賢之理究古今人事之得失推有於無生無於有世之顯者可使之沒世之沈淪者可使之顯馳騁所至雖英雄不可得而議鬼神不可得而知浩浩乎與天地爭功能蓋天地非聚夫至精至純之氣不足以生斯人於世雖欲不惜之不可得也生之也難故惜之也甚惜之也甚故生之於世也少理數然也今夫生數百萬於天下者何損天地之氣

而天地之氣必因文人而泄將欲不惜之可乎而世之能文章之士不知天所甚惜之意一處草莽則號呼於人見夫豪官勢人甘於奔走不暇殊不知彼可尊我可賤我也天何生彼之多生我之少也生之也少則我之尊於彼者多矣雖在飢寒之閒猶爲可貴而乃爲彼屈抑何不自惜之甚哉予觀古今文人其不屈者鮮矣雖韓文公之賢猶不免此是以未嘗不爲之太息也陳君原采之文其嚴重也如大儒之執禮周旋必中矩度其和通也如巧夫之呈技斂散反復機括轉移之閒又非在己者求之於世如原采者無幾人原采嘗言趙孟之貴非吾所願陶朱之富非吾所慕使吾文如古聖賢是

吾心也其氣節庚庚略不爲勢家所屈疾風破屋斂衾而坐誦猶不止原采豈無人心哉蓋天之所以與我者甚重而我不得不自重也然所以自重者非恃吾所有以驕慢人世廼所以重乎天也昔傳欽之名堯俞別本作章子厚非欲見陳后山知后山之貧也懷金往見一談之頃金竟不敢出甚矣欽之之知人后山之能自處其身也故今誦后山之文不衰原采其后山乎何陳氏之多賢也於乎世習日下士不以文章自重皆挾爲取富貴之資而已耳得如原采而友之豈非吾之願哉故序其文以見其可重者在此而不在彼也洪武某年月日書

新刊靜學王先生文集後序

邑人謝省世修撰
赤城後集三十

昔歐陽文忠公謂眾人之與草木鳥獸之死同一歸於腐壞泯滅獨聖賢於其閒異於眾人草木鳥獸雖死而不朽逾久而彌存也若吾靜學王先生國朝仕至翰林修撰西江楊文貞公實先生之所舉者壬午歲不病而客死於廣德逮今壬辰七十有一年矣生氣猶凜凜不朽而存非得聖賢之道能之乎省爲邑人於先生死後二十年生又二十年喜從長老談先生節義事始知先生之所以死而內閩安人死于狂二女同死于井噫臣死于君妻死于夫子死于父非道充于身行于家能之乎先生尤善于文章省恨不得一覽去年冬從吾台守阮公必成得是集讀之無一言不本于仁義之所發其

送友人應薦詩有曰吾觀古豪士道在身可捐與其不
義生有媿于皇天寧令就義死含笑歸黃泉數語當時
不知先生者孰不以爲夸詞後先生卒踐其實可見死
生素定于胸中而自處處人同一心也林先生公輔吾
台名儒序先生之文稱其氣節庚庚略不爲勢家所屈
先生之生如此則能如此死也不難矣林先生所序之
文棄散不存此則十之一二省恐久而亡失謀吾衡守
徐公定之斥俸錢繡梓布傳四方使大夫士讀之見先
生之行不違其言實有得于聖賢之道所以異于眾人
草木鳥獸之死不朽而存者雖千萬世猶一日也先生
名叔英字原采靜學其別號黃巖人墓在廣德無子孫

以世其家惜哉是歲冬臘月吉日邑人桃溪謝省世修序

書靜學王先生文集後

邑人徐孚定之撰錄

靜學集附

嗚呼節義人之大閑也求能真知而實蹈者鮮此亂臣賊子之所以常接踵于世也惟知哲之士灼知天理之在人本實而無僞是以知生有不重于義死有安于生故寧殺身以全義不求生以害仁也若吾邑靜學王先生其真知而實蹈者乎先生于死時沐浴具冠服作絕命詞一首而告逝嗚呼人孰不死求如先生之從容就義者真難矣其扶綱常植彝倫豈淺淺哉先生洪武中與同郡方公孝孺林公佑以文行著名林公嘗敘先生

之文而先沒方公亦繼先生謝世今其文章有刊刻流
布者矣先生之文東里楊少師先生存曰欲加纂集求
無完稿深悼惜之今寶慶太守謝君世修甫慨生也後
而不及拜先生以承其教幸得先生文將以私錢募工
刻之爲序于後以廣其傳使後來景先生之行者可因
文而考先生之心爰以書來告且俾相其事嗚呼林公
序先生之文詳矣死而成仁取義孚恐歲月易更將有
不知其詳者敬以幼聞父兄之言書達謝君附之卷尾
使後讀先生之文者庶因而得先生之本心云成化癸
巳邑人徐孚敬書

按徐孚字定之御史湯字敬之之弟
御史新字德新從子黃巖大禮人正

統六年辛酉舉
人衡州知府

遺詩

留別胡饒文詩

我來遊天台非爲求神仙行行山水閒將欲遇才賢選
近得吾子姓字聞昔年開懷吐言論文彩何郁然山花
與澤卉照耀春風前迺知盛名下眾口非空傳相會惜
遲暮忽別誠可憐飲我綠玉醕贈以瓊瑤篇冀我卽來
返庶以相盤旋茲情旣云厚孰敢違所言館客況有地
舍此復何遷還期誓不遠恆看山月圓攜君一樽酒相
候大溪邊

送友人應薦詩

平生愛交友相知無幾人如君晚結好乃獨深相親自

從交接來始歷三秋春其閒僅數會每會必傾真好語
類弦直和氣如酒醕世道日卑降友義久已渝不意凡
礎中見此席上珍自謂得良友可以資吾仁君今應薦
起得失未足論嗟余獨感歎黯黯成銷魂夫人出處際
我固嘗能言不仕旣非義豈得徇私恩嗟乎今世士未
必皆愚惛奈何貞素節未見有赫烜淺夫或未喻君宜
識其原咎罪良訶譴玉石慮俱焚視貨可扶難遂長利
欲根以茲重獲戾刑獄亦已繁謀身有大道始仕將未
聞人生貴盡職福祿何足云爲子必恭順爲臣必忠勤
君父我同體淑慝寧無分天聽果遐邈縱死亦何怨吾
觀古豪士道在身可捐與其不義生有媿於皇天寧令

就義死含笑歸黃泉肯從濁濁流包羞享華鮮嗟余有此語蘊蓄會未宣匪爲知己謀何由出咽咽君其諒無憾當爲後世傳

詠窗前竹二絕句

有序

齋窗之前昔年手種小竹五株今歲始覺生意漸盛余自顧贊教于茲歲將七週矣兩年之後又當考滿而去與此君不能久矣代余而居此者今雖未知其誰使有賢于我繼余以交此君吾亦知此君不能忘情于我矣慨然有感遂成絕句二首一以勉諸生之善學使勇于自進以滿鄙懷之望一以期後人之善教俾臻于有成以爲斯文之光云

七載論經在泮林窗前種竹未成陰自憐相看無多歲
早發高梢慰我心

眼底新篁欲作林栽培一一自經心後人得此宜深護
留與琴書作好陰

遺文

資治策

并序九首今錄四首

臣惟三代之下得天下以正者惟漢唐宋而已漢高祖
起布衣順人心除秦暴此最得其正者也宋太祖平五
代之亂雖以周臣代其位然出於人心所推戴亦得其
正者也唐高祖雖隋臣亦因人厭隋政以除其亂亦庶
幾得其正者也惟其得之以正故其傳之也遠自漢唐

宋之外無足數者矣惟我太祖高皇帝當元政衰亂羣
雄競起之時以布衣提三尺埽除兇僞卒成攘夷狄安
中國之大功創業之跡方之唐宋尤無慙德真可與漢
高祖並稱矣是則三代以降得天下最得其正者惟漢
與我朝而已然自高祖之身已受挫於匈奴而其土宇
亦未甚開廣厯惠帝文景之世皆有匈奴之患至於武
帝窮極兵力而後夷越以定匈奴漸衰豈若我太祖皇
帝疆土漸闢四夷咸賓身親致之其功比之漢高蓋益
隆矣且漢高又以過愛寵姬欲廢嫡子而立庶子後雖
以太子能致四皓之故位由以定然終非出其本心於
德有損而我太祖皇帝無有偏寵私愛立子立孫必以

豕嫡比之漢高尤無遺憾是以天下有識之士觀我朝創業垂統正大隆厚如此以是卜知國祚當有萬年之永非漢唐宋之遠可比隆也今皇帝陛下繼承大統誕修文德善政仁聲日益布聞四海之內若臣若民罔不歡慶萬姓一辭咸謂聖明在上唐虞雍熙之治可以復見於今日是以天下之士莫不願仕於當時天下之人莫不願生於斯世國祚靈長之符已可驗矣天下人心娛樂若是何以於今日始見之蓋太祖皇帝除姦剔穢抑強鋤梗不啻若醫之去疾農之去草者也夫急於去疾者或傷其體膚嚴於去草者或損於禾稼固自然之勢也體膚疾去之餘則宜變養其血氣禾稼草去之後

則宜培養其根苗亦自然之理也太祖皇帝之心固以此待於陛下天下之情亦以此望於陛下今既有以副皇祖之心下有以答羣生之望固宜乎人心之娛樂見於今日也人心之所歸卽天命之所屬豈有得人心而不可以得天命者哉臣竊以爲得人心於一時者易得人心於永久者難今陛下卽位之初人之所望者猶淺他日治政既久人之所望者不止如今日而已蓋今日天下之心莫不期陛下爲堯舜觀陛下今日所發號施令而措諸天下者固皆本乎堯舜憂民之心矣安知異日之治不能匹儔於堯舜而臣爲是言哉誠以其身已能而不厭乎人之告戒者堯舜之君也其君已能而

不忘乎己之告戒者堯舜之臣也稽諸虞書可以見矣
臣學術疎淺才無一長固不足以爲堯舜之臣然獨有
忠君愛國之心可以自許平居每思當世之務時有管
窺蠡測之見私竊自顧處職疎賤欲以上陳則有出位
之嫌恆恐碌碌無分寸補益當世與草木同腐今幸遭
陛下以堯舜之道爲己任求賢用言惟日不足如臣之
愚昧亦蒙徵召爰自聞命以來且喜且懼所以喜者以
獲覩聖顏庶可陳其平時素蓄之志所以懼者以才術
疎短不足以應明主非常之求旣又自念凡人知識各
有短長臣之事君惟當竭其所知而已固不可強其所
不知以爲知亦不可因其不知而遂廢其所素知以爲

不知者於是輒自奮勵而敢陳其夙昔微見於陛下也
臣聞帝王之治無他求以安民而已蓋爲治之道必本
於修身必在於親賢親賢而後可以任官任官而後可
以立政立政斯可以安民民安則雍熙之治可以馴致
矣臣今謹陳資治策八條其一曰務學問其二曰謹好
惡所以修身也其三曰辯邪正其四曰納諫諍所以親
賢也其五曰審才否其六曰慎刑賞所以任官也其七
曰明利害其八曰定法制所以立政也政立則民安矣
伏惟陛下自繼位春宮日與儒臣講求理道固已體諸
心而見諸行及卽位以來凡所設施無非順民之心而
不私於己則於學問不爲不務好惡不爲不謹矣日以

進賢退不肖聽言用謀爲務則於邪正不爲不辯諫諍
不爲不納矣俾內外大小之臣各舉在位賢否賞不僭
而刑不濫則於才否不爲不審刑賞不爲不慎矣聞利
必舉聞害必除著而爲令布之天下則於利害不爲不
明法制不爲不定矣是則凡臣所陳皆陛下之所已能
者也知陛下已能而猶不已於言亦庶幾追慕乎堯舜
之臣所用心耳惟望陛下恕其狂愚之罪納其忠愛之
情而裁察之毋恃其所已能而益勉其所未至則於久
安長治之道未必無補於萬一而人心可以永得天命
可以永膺矣謹陳其策如左

一務學問

昔傳說告高宗之言有曰人求多聞時惟建事學於古訓乃有獲事必師古乃克永世臣以是知爲人君者不可以不學而所以學者必於古訓而後可蓋古訓者先王已行之法載諸方冊而其善惡治亂之效已章章乎可驗而不可誣者後世君臣雖有賢聖所言所行豈能過之故爲人君者誠能於古訓學焉而以其善而致治可以爲法惡而致亂可以爲戒者體之於身驗之於當時而力去取之則於治天下不難矣臣竊觀三代之善惡治亂載於經漢氏以下善惡治亂載諸史陛下如欲師其治而鑒其亂宜倣前代置經筵以有識儒臣爲經筵官聽政之餘使之朝夕以經史善惡治亂之說講陳

於左右陛下聞一善行則宜反而體之於身曰彼善行也吾身有是否乎無則修之有則加勉可也聞一不善之行亦必反而體之於身曰彼非善行也吾身有是否乎有則改之無則加勉可也如是則吾之行無不善矣不獨於行然也聞一善政亦宜反而驗之當時曰彼善政也吾今日有是否乎無則舉之有則守之可也聞一不善之政亦必反而驗之於當時曰彼非善政也吾今日有是否乎有則去之無則益修可也如是則吾之政亦無不善矣行與政俱無不善天下其有不治者乎伊尹曰與治同道罔不興與亂同事罔不亡此之謂也董仲舒曰事在勉強而已強勉學問則聞見博而知益明

強勉行道則德日起而大有功由是言之陛下如果以臣言爲然也亦惟在乎勉強而已矣

工謹好惡

臣聞人君之所好天下之所趨人君之所惡天下之所棄是故上好仁則人皆興於仁上好利則人皆興於利上好忠則人皆興於忠上好佞則人皆興於佞譬之形立則影隨聲發而響應固自然之勢要不可以不謹也凡人惟豪傑之士爲能自立自中人以下未有不從化於上者昔裴矩佞於隋而忠於唐蓋矩於隋非不能忠也以忠非隋所好故不爲忠而爲佞於唐非不能佞也以佞非唐所好故不爲佞而爲忠夫忠之與佞固若薰

猶冰炭之相反而矩以一人之身而其變化之易如此
以此推之則知臣之善惡惟視君之好惡何如耳君陳
之書曰凡民違上所命從厥攸好又曰爾惟風下民惟
草皆言爲人上者不可不謹於好惡如漢之張釋之蓋
亦知此故於文帝善嗇夫之口辯欲超遷之而釋之不
奉詔因言於帝曰恐天下隨風而靡爲口辯而無實下
之化上疾如影響舉措不可不審帝善之而止釋之可
謂知教化之本矣非文帝之賢烏能從之今陛下之好
惡固已皆謹未聞有不得其正者惟願謹而益謹焉耳
謹而益謹之道何如必也於一舉動之間內以度其可
否於心外以質其是非於人善則行之不善則勿行或

已行而速改之如是則凡發於身而措諸事者無不得其正而天下之所趨亦無不得其正矣

七明利害

臣聞天生斯民立之司牧而寄以三事曰庶富教是也蓋爲人君者將欲遂民之庶必先有以富之旣富之然後可以教之今天下之民未甚庶未能從上之教者以富之之道有未至焉耳富之之道臣嘗讀大學而知之矣大學傳之十章言治國平天下之事有曰生財有大道生之者眾食之者寡爲之者疾用之者舒則財恆足矣是則平治天下之道實本於此臣竊觀之天下凡有害於此者亦頗知其大略矣恆產未制而貧富不均賦

斂未平而田多荒萊此二者生之之本之害也軍卒有多餘之丁而惟務於工商僧道有汙雜之眾而失助於耕稼民之務末者常勝而務本者常貧此三者生之未眾之害也養兵太多而有徒食之軍冗官未汰而有素餐之員此二者食之未寡之害也官司役民或奪其時或盡其力此二者爲之未疾之害也土地有可養之物而不養民粟有可儲之時而不儲民用有可省之費而不省此三者用之未舒之害也臣請得而詳言之古者井田之制一夫授田百畝故民生業均一後世井田旣廢故民業不均至於後魏有均田之法北齊有永業之制唐有口分世業之田雖非先王之舊然庶幾使民有

恆產者自唐以後恆產之制至今不行故富強兼并至有田連阡陌者貧民無田可耕故往往租耕富民之田而輸其收之半由是富者愈富貧者愈貧此恆產未制之害所以貧富不均也古者田皆在官故什一之稅通乎天下而賦斂以平後世田有官民之分故賦有輕重之異官既事繁而需於民者多故田之係於民者其賦不得不輕惟係於官者其賦重而亦有過於重者官民之田肥瘠不等則賦稅有差然或造籍徇私往往以肥爲瘠賦當重而反輕者有之以瘠爲肥賦當輕而反重者有之若夫官田之賦雖比之民田爲重而未必重於富民之租然輸之官倉道路既遙勞費不少收納之際

其弊更多故亦或有甚於輸富民之租者由是官民之田其入有可輸租賦之餘而又有可以酬其力者民然後可得而耕其不然者則民不可得而耕矣此賦斂未平之害所以田多荒萊也斯二者豈非有害於生之之本乎古者兵出於農則兵固自耕而食者也今爲兵者既不耕而食於農者多而又多有餘丁不爲商則爲工亦是不耕而食於農者今務末者眾而務本者寡實由於此此軍卒有餘多之丁可裁減歸農而未裁減之故也古之爲民者四曰士農工商而已後世益之以僧道而爲民者六故務農者益寡況二氏之教本以清淨無爲爲宗而後世爲其徒者多由避徭役而託於此又倚

其教能使人尊奉有不耕而食不蠶而衣之利由是爲之者眾然能守戒律者甚少而不守戒律者甚多往往食肉飲酒華衣美食肆然營利無異於汙民是則於其本教旣忍違之況可律之於吾聖人之教乎其人可耕稼而不耕稼乃託佛老以爲生無有補於世道而有敗於風俗如此愚民不知彼之身已獲罪難免猶謂人之事其徒者足以獲福且輟己之衣食以奉之其惑世誣民甚矣昔唐高祖嘗議除之以此故耳人之坐食者眾而資食者少實由於此此僧道有汙雜之眾可除省助農而未除省之故也古者制民之法以農爲本故常厚之以商賈爲末每常抑之後世抑末之法猶存而厚本

之法每病於費廣食眾不能行之故爲商賈者益多然
商賈獲利既厚而財貨有餘農民往往不給反稱貸於
商賈況又有工藝之家男女或盡棄耕織不務生業而
施奇技淫巧爲服用之物以漁厚利徒多費工力而無
益於實用農人竭一家之力者或不足以當其一夫之
獲積一歲之收者或不足以副其一家之售由是務末
者恆有餘而務本者恆不足誠以務末恆勝而務本者
常負之故也斯三者豈非有害於生之末眾者乎古者
天子不過六軍諸侯用兵不過三軍近世宋太祖天下
精兵亦不過二十萬以十萬屯京師十萬屯外郡今京
師之兵已十萬而在外郡者不知其幾以此推之今之

兵過多而有徒食者可知矣天下賦斂之難平儲蓄之未豐實由於此昔唐虞稽古建官惟百夏商官倍亦克用又後世事漸繁密故官亦漸增然唐太宗省內外之官定制七百三十員曰吾以待天下之賢足矣今內外大小之官數以萬計以此推之今之官多員冗而有素餐者亦可知矣天下賦斂之難平儲蓄之未豐亦由於此斯二者豈非有害於食之未寡者乎古者用民歲不過三日然役之必於農隙之時後世事繁故徭役浸多然唐太宗制租庸調之法其役民歲亦不過一十日蓋由其能省事故也故其法至今稱之今天下有司役民無度四時不息由其不能省事故也至於民移州縣人

丁應役諸役不給丁才當差亦有男丁有故而役及婦人者奈何而民不窮困乎蓋由州縣有應併省而不併者其民既稀其役自繁是以民稠州縣雖不盡其力亦奪其時民稀州縣既奪其時又盡其力也斯二者豈非有害於爲之未疾者乎古者山林川澤與民共之而有厲禁是以斧斤以時入山林材木不可勝用數罟不入洿池而魚鼈不可勝食後世之民困於徭役者多故其入山林不能限之以時欲急近利者眾故其入洿池多以數罟由是材木常用之不給魚鼈常食之不充此所謂土地有可養之物而不養者也古者三年耕而有一年之儲九年耕而有三年之積故雖有水旱之災而民

無菜色後世賦重役多故多無餘蓄然漢宣帝時以歲數豐穀賤農人少利因置常平倉令穀賤則增價而糴以利農穀貴則減價而糶以利民至隋唐皆有義倉於收穫之時勸課出粟以防饑饉皆良法也其法今皆未行或有水旱之災何以備之此所謂民粟有可蓄之時而不蓄者也古者制民之用宮室飲食器用之制婚姻喪葬祭祀賓客之禮貴賤各有等差不得過侈而又無有釋老齋醮之設妖淫鬼神之祠故民無妄費而財用常足後世雖或有制而未必盡行故以庶民之賤苟富有財貨之家其居處服用之物與凡吉凶之禮擬於公侯者有之至於齋醮則有累日之設費用至百數千緡

者有之其貧無財貨者雖以居處服用之物無以適意至有婚姻之事往往貸假於人務爲浮奢以資觀美者有之及有親戚之喪或窮竭家貲設作齋醮以杜外議者有之若疾病則訪之巫祝必歸咎於諸淫祠苟乏祭物或竭己貲而致衣食窘乏者有之或舉債於人而致田廬典賣者有之此所謂民用有可省之費而不省者也此三者豈非用之未舒之害乎凡此數者特其大略耳若其他固非臣之所能盡知而徧舉欲致民富之道有害如此此所以未能遂民之庶而教化所以難行也陛下苟能因臣之所知而益求其所未知明其爲害則除之明其爲利則興之將見富庶之效不數年而可致

而教化之行有不難矣

送卓景高序

吾友卓景高以行業修著有譽於人久矣今年夏嘉興之海鹽縣學以浙江參議公之命遣二生走數百里致幣於景高之廬請訓經於其學弟子戒行有日矣予與景高交最深乃贈之以言曰韓子有云弟子未必不如師師不必賢於弟子世俗淺儒不知是道苟居師位輒不自下務以博聞多識篤服其徒然而聞未必博也識未必多也故於傳授答問之間往往蔽其所短而見其所長隱其不知而罔爲已知內以欺於心外以欺於人其爲害也甚矣余昔與吾友同學於仙居張先生者博

記多聞諸經兼治然其爲文常以示其徒習文者使是非之言之而是未嘗不從是不蔽其所短也陳先生者雖聞記有限然專精於尙書弟子請問有所不知不敢強詞以對不曰忘之則曰我未之稽是不隱其不知也故當時門人輕劣無知者或笑其短而敦厚有識者俱服其賢余數年來亦僭爲師嘗念二先生所爲故未嘗敢有欺於其徒嗟乎彼欺其徒者夫豈其所好哉蓋亦有所恥而然也殊不知天下古今之事變無窮雖賢聖不能盡知況學者乎傳曰知之則曰知之不知則曰不知是知之道也亦何恥哉孔子以大聖之才爲七子之師且以助我望於顏子以起予稱於子夏由是言

之爲師者豈盡賢於弟子乎景高以敦實厚重之資通
潔淨精微之學其教人之術固恢恢乎有餘者又豈待
於余言哉洪武二十一年六月十二日序

送教諭韓君歸廣東遷葬序

天台學教諭韓君與吾仙居學教諭麥君皆廣東人俱
以郡學生中洪武丁卯歲鄉貢進士第由是竝擢爲學
官二君生同方學同業舉同年官同職且同郡甚相好
也今韓君以其先府君之墓侵於城郭假歸改葬麥君
亦欲歸葬其親故韓君取道仙居將與麥君偕行而麥
君適以事牽不果二君之意有不釋然者余解之曰人
之生同方者多矣而學同業者有幾舉同年者有矣而

官同職且同郡者復有幾二君昔之所同不圖於同而自同今之所異不圖於異而自異其同也若或使之其異也若或禦之是豈人力之所能爲哉豈所謂莫之爲而爲者豈非天乎人惟知天而後能盡心於其所當爲而不妄意於其所難必若然則雖大而窮通榮辱禍福死生有不足以動其心矣況其事之細者耶二君皆廉慎君子蓋幾於知天者故余以是告之旣以慰麥君之心復以相韓君之行云洪武二十有四年正月壬午序送洪仲蕃序

國朝於天下郡若縣咸建學校置弟子員立師儒以教之而師儒之職必任之以明經飭行之士雖有文行而

非明經習舉子業者亦不得以任之欲其備也由是教職之選恆乏其人而學校師位曠缺者在在有之洪武二十四年朝廷患學校缺師之多是時方召天下老成人集於京師於是命擇敦雅而有文章者俾充教職武昌郡學訓導洪仲蕃先生台黃巖人始隱居鄉里兀處鳶山中好與高人逸士交遊獨以經史詩歌自娛而於勢利聲華澹然無所嗜及應教職曰祿焉而曠其事君子弗爲也於是蚤夜孜孜專以造成後學爲事蓋先生之行修於家而信於鄉者旣久固有以淑諸人然其素所學於經者惟以窮理爲務初未嘗習舉子業自職教於茲始取先代科試之文讀閱之未幾而有得素學舉

子業者或反有不逮由是其所教弟子登第者居多先生既名實日著尤素有長於歌詩聲而武昌實秦楚之衝爲江南大都會其仕於王府位於政憲兩司與夫自京師及四方來者率多尊官顯人往往皆有求於先生得其片言隻字莫不貴而寶之如獲良金美玉其見重於人如此今年秋有例徵入天官蓋將改授他職其僚友及諸生無不惜先生之去以謂失良師友政憲兩司諸公及太守鄧公咸欲上章於朝留先生勿行先生固止之蓋以年老頗厭應接之勞欲因是徵請於朝而歸休故鄉以終其餘年也夫以先生之文行雖使之輔教京都太學殆不爲過況州郡之學乎先生年雖老如師

儒之職尙猶可任今聖天子方隆文明之治欲求老成
之士賢而有文如先生者夫豈易得先生歸休之志克
遂與否固未可知也某獨念與先生同邑年雖頗後於
先生然自託交以來蓋三十餘歲矣先生來武昌之七
年而某亦來佐教德安雖相去遠數百里而二年之間
亦兩會見其爲喜幸不啻若骨肉之親久離而復合也
今者又復遠離未知後會更在何地固不能無悵然於
懷抑又歎丈夫幸生聖明之時政有道者得以大行之
日如某之不肖不足淑人者固當退歸田野與農樵爲
伍乃以年壯欲退而不能甚可媿也如先生真足以淑
人者政可與當世賢傑相左右乃以老而欲休良可惜

也某宜老而反壯先生宜壯而反老豈不有負於明時也哉序此以贈先生之行使覽者知先生之可惜而余之有媿也洪武三十一年十有一月丁丑日某序

蔡按丹邱舊隱圖序作於洪武三十年十月言洪仲蕃年五十餘佐教武昌郡學余今年春亦來佐教德安郡學則是時仲蕃當已六十矣靜學自云年頗後於仲蕃託交已二十餘歲則洪武之末靜學之年當在四十以外無疑矣

草心堂詩序

爲子者之不足以報其親之恩亦猶萬物之不足以報天地之恩也天地之恩非萬物之所能報而萬物之中

有超乎其類而聖如堯舜足以參贊天地之功者亦可謂能報之矣然而堯舜之心亦未嘗自謂足以報天地之恩也故孔子曰堯舜其猶病諸父母之恩非人子之所能報而人子之中有超乎其類而賢如曾參足以承順父母之志者亦可謂能報矣然而曾參亦未嘗自謂足以報其親也故孟子曰事親若曾子者可也蓋萬物之靈者莫如人而人之中莫靈於堯舜堯舜且以爲不足報天地之恩況其不如堯舜者乎故人之孝者必曰子而人子之中莫孝於曾參曾參且以爲不足報其親之恩況其不如曾參者乎昔唐之孟郊有見乎此故郊自念不能報其親而作爲游子吟之詩有曰難將寸草

心報答三春暉其意蓋以天地之恩喻父母之恩而歎其難報此非知孝於親者其能發此乎然郊之詩以戾於羈旅窮困不能養其親而作固宜其形於言者如是今吏部郎中永嘉楊公爲人溫良謹厚方其未仕也未嘗旬月違遠其親其所以事親宜無不至矣及其既仕而尊公擯館又得循例歸盡喪葬之禮今公復出而仕於朝太夫人在堂既有二弟足以爲養而其祿俸之入又足以資其祭養之具是其身既無羈旅窮困之悲而其親信非如郊之不得養者顧乃亦以不能報其親而有取於郊之詩語名其堂曰草心人固不能無疑於公者余以謂不然人子事親之心凡其易於自足者必不

能孝於其親惟其常不自足者斯能孝於親者也孝如
曾參且不自足公固學會者也烏能以是而自足哉推
是心也不惟能孝於親要必能忠於君矣不惟能忠於
君凡日用彝倫之間將無所不用其極而人道於是乎
盡矣若然則顯親揚名將於是乎在豈果不能報其親
如寸草之於春暉乎公固以此自期而士大夫亦以自
期於公者觀諸公因公之有是堂而爲之作爲歌詩者
可見矣公以諸公之詩宜有序而以屬於余余辭不獲
故爲說以序之如右

一清軒記

天下之物莫貴於清莫不貴於污天下之情亦莫不好

清而惡污何也蓋清者善而污者惡好善而惡惡人之性也物之出於天者其清莫如風出於地者其清莫如水風之清以動萬物爲功水之清以潤萬物爲功而物由之以生以長以遂以成清之爲用大矣是以王者清而四海以平侯伯清而國以寧官師清而政以成蓋清則明明則公公則仁仁則何處而不順哉故君子惟患不清也今夫人見一廉士焉鮮不貴而愛之以其清也見一貪夫焉鮮不賤而惡之以其汙也至於其身則不知所貴而乃污之豈視其身不如他人哉利欲交於中而不能自克耳黃岡張侯以一清名其軒求余文以記之余謂張侯蓋知貴其身者歟人固患乎不清也而清

又患乎不一能一於清則小物不足累大物不能移而
吾心常超乎萬物之上矣其貴孰加焉夫人亦有於平
居無事之時頗清明自期及臨利害僅如絲髮則窮智
力巧爲趨避以求必得者蓋由其守之不一耳故清而
能一斯可以言清不一則不足以言清矣書曰惟精惟
一是則一豈易能哉要必精於義理之辨而後能不然
則事物之來眩惑於前而莫知所從烏保其能一乎故
君子必貴乎學也張侯爲武官而好文辭其接人貌恭
而言文蓋喜學者昔呂蒙爲吳將初不知學後與魯肅
論議而肅驚之以學故也蒙之學徒以知軍旅之用猶
有過人者況學君子之事乎張侯年盛力强又幸生太

平之時職務多暇足以有爲苟能因其所好而事學焉
則他日所就豈余所能量哉洪武二十年歲次丁卯冬
十一月某日記

原命一首贈楊文忠別

人之生或貴或賤或富或貧或壽或夭其貴之等則有
爲公爲侯爲卿大夫爲士者焉其賤之等則有爲農爲
工爲商賈爲奴隸者焉其富之等則有百金千金萬金
以至於貨利無算者焉其貧之等則有無一歲之蓄一
月之蓄一朝之蓄者焉其壽之等則有五六十年七八
十年九十百年者焉其夭之等則有四三十年二三十
年與不滿十年及一歲者焉是其故何哉蓋有命焉非

人之所能爲也。命者何？人受天地之氣以生者也。夫貴者得乎氣之崇高者也，賤者得乎氣之卑下者也，富者得乎氣之豐潤者也，貧者得乎氣之枯瘠者也。壽者得乎氣之攸長者也，夭者得乎氣之短速者也。其閒又有等級之不齊者，隨其所得之氣有多寡也。是故貴者不可使之賤，貧者不可強之富，壽者不可奪之夭，固有始出奴隸而終受侯封，生飫梁肉而沒無飯含，出入鋒刃而老死衾帷者，豈其智力所能及哉？故孔子稱死生有命，富貴在天。至論富則曰：富若可求，則執鞭之役吾亦爲之；由是觀之，豈非命歟？古之君子知其然是故爲其分之當爲，而不以利害死生易其節，不失其心，無媿於

人不求福而福在其中故其生則無媿於爲人而身有餘榮沒則無媿於爲神而子孫蒙其福後之君子其明乎此者蓋鮮矣是故於其分之當爲者漫不加省而於利害死生之際則巧爲趨避無所不騁其私徒違其心而傷於物終亦必及其身而後已故其生有餘恥而沒有餘殃甚可歎也余嘗與友人楊文忠論而悲之文忠始由縣學生升太學上舍嘗入試文淵閣其文冠多士及出爲永福丞以廉能有聲譽復還鄉里囊橐蕭然居憂三載力耕以自給未嘗妄求於人豈非可謂知命君子歟今其服闋往覲京師將獲有職任之寄余欲其無變於初志益務其當爲也故以所嘗爲議論之言作原

命一篇以贈其行亦因以自勸焉洪武二十有二年九月乙巳著

愚齋箴

求君孟直以愚名其齋求余爲之箴夫世之愚者莫如余其何以箴求君耶然其意勤甚不得無言非惟以箴求君也亦因以自箴焉其箴曰

天之生人少哲多愚愚之與哲相去雖遠化愚爲哲其道則近我觀古人哲人如愚是以益哲愚人自哲是以益愚夫哲莫如周公孔子然猶恂恂如弗能兢兢如或失學如不及夜以繼日矧於愚人其當何如今吾後人其果哲耶固宜退然若愚志師周孔以求其如況其愚

也可不懋焉夙夜孜孜惟周孔是師

跋宋名臣八人遺像後

右宋趙韓王韓忠獻公文忠烈公司馬文正公歐陽文忠公黃太史王荊公蘇文忠公八人之遺像元史官周伯琦跋其後以謂其先出於霜月翁劉訥之所畫今本則忠獻公十世孫諤屬吳郡張湮之所臨也劉訥者余固未知其何人然趙韓王在太宗之世而忠獻公以下七人皆在仁宗以下之世則此八人之像其初非出於一人之筆明矣蓋訥之本偶得此數公之像臨之併爲一卷耳今以此八人之事言之若趙韓王則專以功業聞若忠獻忠烈文正三公則兼以功業道德顯若歐蘇

二文忠則以文章事業著若黃太史則專以文學名是七公者其閒固亦有不可並列者矣荆公始以文學操行取重當世致位宰相卒以其術敗亂天下爲宋禍跡其所爲雖欲與黃太史並列亦不可得況可列於司馬文韓諸君子之閒乎吾用是知劉訥之本非以此八人可以同列而其圖蓋出於偶得諸像臨之而併爲一卷者也且八人之像惟趙韓二公迺在朝之衣冠而忠烈公以下皆退休之服此尤可以見訥之本爲偶得諸像而臨之者無疑或者不察而妄以八君子名之至有謂荆公之操守有非諸君所可及者可謂失之甚矣余固不可以不辯然余又卽諸公之像而觀之惟趙文韓歐

四公之貌稱其功業道德溫公以下三人皆不稱其德業文章而荆公之貌溫其如玉者也由是觀之以貌取人其失者多矣是豈不可以爲觀人者之鑒哉觀此卷者以余前所言而能求自進於君子之列以余後所言而寧使德勝其貌而不使貌勝其德如是則觀像固爲有益於身而圖像又豈不有補於世哉

與方正學書

僕與執事別十餘年其閒情慕之淺深書問之達否曰事之細者耳姑置之不足道也惟執事之身係天下之望仕之進退天下之幸不幸與焉側聞被召計此時必已到京獲膺大任矣茲實天下之大幸也故敢有說以

進於左右焉凡人有措天下之才者固難自用其才者尤難如子房之於高祖能用其才者也賈誼之於文帝未能自用其才者也何則子房之於高祖察其可行而後言言之未嘗不中高祖得以用之而當時受其利故親如樊呂不可得而閒信如陵勃不可得而非任如蕭何不可得而奪此子房所以能自用其才也賈誼之於文帝不察其未能而易言之且又言之太過故大臣絳灌之屬得以短之於是文帝不能獲用其言此賈誼所以不能自用其才也方今聖天子求賢用才之意上追堯舜固非高祖文帝可比而執事致君澤民之術遠方皋夔亦非子房賈誼可倫真所謂明良相逢千載一時

者也將見吾君不問則已問則執事必能盡言執事不言則已言則吾君必能盡用致斯世於唐虞雍熙之盛者在是矣豈非天下之幸歟雖然天下之事固有行於古而亦可行於今者亦有行於古而難行於今者如夏時周冕之類此行於古而亦可行於今者也如井田封建之類可行於古而難行於今者也可行者行之則人之從之也易難行者而行之則人之從之也難從之易則民樂其利從之難則民受其患此君子之用世所貴乎得時措之宜也執事於此研諸慮而藏諸心者非一日矣措之猶反掌耳尙何待於愚言之贅哉然僕聞知者千慮必有一失愚者千慮必有一得故不能無言於

左右耳夫人情愛其人之深而慮其患之至者必救其
失於未患之先苟待其既失而後救之是乃愛之淺而
慮之疎也其得爲忠乎天下知執事之深愛執事之至
如僕者固多矣竊謂忠於執事未能有過於僕者伏惟
少垂察焉

台學統卷三十

黃巖王 蔡輯

吳興劉承幹校

性理之學十八 明儒四上

忠文方正學先生孝孺^上

明史列傳方孝孺字希直一字希古寧海人父克勤洪武中循吏自有傳孝孺幼警敏雙眸炯炯讀書日盈寸鄉人目爲小韓子長從宋濂學濂門下知名士皆出其下先輩胡翰蘇伯衡亦自謂弗如孝孺顧末視文藝恆以明王道致太平爲己任嘗臥病絕糧家人以告笑曰古人三旬九食貧豈獨我哉父克勤坐空印事誅扶喪

歸葬哀動行路既免喪復從廛卒業洪武十五年以吳
沈揭樞薦召見太祖喜其舉止端整謂皇太子曰此莊
士當老其才禮遣還後爲仇家所連逮至京太祖見其
名釋之二十五年又以薦召至太祖曰今非用孝孺時
除漢中教授日與諸生講學不倦蜀獻王聞其賢聘爲
世子師每見陳說道德王尊以殊禮名其讀書之廬曰
正學及惠帝卽位召爲翰林侍講明年遷侍講學士國
家大政事輒咨之帝好讀書每有疑卽召使講解臨朝
奏事臣僚面議可否或命孝孺就展前批答時修太祖
實錄及類要諸書孝孺皆爲總裁更定官制孝孺攷文
學博士燕兵起廷議討之詔檄皆出其手建文三年燕

兵掠大名王聞齊黃已竄上書請罷盛庸吳傑平安兵
孝孺建議曰燕兵久頓大名天暑雨當不戰自疲急令
遼東諸將入山海關攻永平真定諸將渡盧溝搗北平
彼必歸救我以大兵躡其後可成擒也今其奏事適至
宜且與報書往返踰月使其將士心懈我謀定勢合進
而蹴之不難矣帝以爲然命孝孺草詔遣大理寺少卿
薛嵩馳報燕盡赦燕罪使罷兵歸藩又爲宣諭數千言
授嵩持至燕軍中密散諸將士比至嵩匿宣諭不敢出
燕王亦不奉詔五月吳傑平安盛庸發兵擾燕餉道燕
王復遣指揮武勝上書伸前請帝將許之孝孺曰兵罷
不可復聚願毋爲所惑帝乃誅勝以絕燕未幾燕兵掠

沛縣燒糧艘時河北師老無功而德州又饋餉道絕孝孺深以爲憂以燕世子仁厚其弟高煦狡譎有寵於燕王嘗欲奪嫡謀以計閒之使內亂乃建議白帝遣錦衣衛千戶張安齎璽書往北平賜世子世子得書不啟封并安送燕軍前閒不得行明年五月燕兵至江北帝下詔徵四方兵孝孺曰事急矣遣人許以割地稽延數日東南募兵漸集北軍不長舟楫決戰江上勝負未可知也帝遣慶成郡主往燕軍陳其說燕王不聽帝命諸將集舟師江上而陳瑄以戰艦降燕燕兵遂渡江時六月乙卯也帝憂懼或勸帝他幸圖興復孝孺力請守京城以待援兵卽事不濟當死社稷乙丑金川門啟燕兵入

帝自焚是日孝孺被執下獄先是成祖發北平姚廣孝以孝孺爲託曰城下之日彼必不降幸勿殺之殺孝孺天下讀書種子絕矣成祖領之至是欲使草詔召至悲慟聲徹殿陛成祖降榻勞曰先生毋自苦予欲法周公輔成王耳孝孺曰成王安在成祖曰彼自焚死孝孺曰何不立成王之子成祖曰國賴長君孝孺曰何不立成王之弟成祖曰此朕家事顧左右授筆札曰詔天下非先生草不可孝孺投筆於地且哭且罵曰死卽死耳詔不可草成祖怒命磔諸市孝孺慨然就死作絕命詞曰天降亂離兮孰知其由奸臣得計兮謀國用猶忠臣發憤兮血淚交流以此殉君兮抑又何求嗚呼哀哉兮庶

不我尤時年四十有六其門人德慶侯廖永忠之孫鏞
與其弟銘檢遺骸瘞聚寶門外山上孝孺有兄孝聞力
學篤行先孝孺死弟孝友與孝孺同就戮亦賦詩一章
而死妻鄭及二子中憲中愈先自經死二女投秦淮河
死孝孺工文章醇深雄邁每一篇出海內爭相傳誦永
樂中藏孝孺文者罪至死門人王稔潛錄爲侯城集故
後得行於世仁宗卽位諭禮部建文諸臣已蒙顯戮家
屬籍在官者悉宥爲民還其田土其外親戍邊者留一
人戍所餘放還萬厯十三年三月釋坐孝孺謫戍者後
裔浙江江西福建四川廣東凡千三百餘人而孝孺絕
無後惟克勤弟克家有子曰孝復洪武二十五年嘗上

書闕下請減信國公湯和所加寧海賦謫戍慶遠衛以
軍籍獲免孝復子琬後亦得釋爲民世宗時松江人俞
斌自稱孝孺後一時士大夫信之爲纂歸宗錄旣而方
氏察其僞言於官乃已神宗初有詔褒錄建文忠臣建
表忠祠於南京首徐輝祖次孝孺云

正學先生事狀

臨海陳紀字德廉撰

赤城後集二十

先生名孝孺字希直姓方氏系出桐廬玄英處士宋初
徙居寧海侯城里曾祖子野祖炯元鄞縣儒學教諭父
克勤母林氏以至正戊戌生先生癸卯母歿時方六歲
哀慕如成人洪武辛亥隨父至濟寧謁曹國李文忠公
公禮貌之期爲國士乙卯父被誣下獄上書丞相府願

以身爲軍贖父罪丙辰以文謁金華宋太史公於翰林
公視其凝重不遷於物穎脫洞釋諸理有喧啾百鳥中
見此孤鳳凰之喜館置左右譚經歷三時會父坐空印
事草疏將詣闕仲理值父歿扶輿歸葬丁巳太史公謝
事還浦陽先生復執經往侍凡理學淵源之統人物絕
續之紀盛衰幾微之載名物度數之變無不言之析於
一絲會歸大道每初發其端卽能逆推而底於極見於
論著文義森蔚辭意濯然常新未始有竭進修之功日
有異而月不同僅越四寒暑而已庚申之秋歸省祖母
公惜別因序其素有之善助以遠大之業且曰予所許
者不獨在文後二十餘年當信其爲知言辛酉公徙蜀

先生往省不獲爲文籲天願以己之壽年輸委乞延師
命壬戌秋在郡城會葉林張陳四君子登巾山絕頂縱
談千古竟夕不寐先生自以此樂乃蘇子瞻死後三百
年所無也癸亥召至京以疾還壬申復召除漢中府學
教授有令許至家與妻偕往癸酉閏四月到任時京府
敗儲君四川遵蜀王命俱以鄉試考文見徵先生辭四
川赴京府甲戌春朝蜀獻王道經夔得謁宋太史公墓
而恤其家王好善忘勢召對不名賜號其讀書之室曰
正學學者稱爲正學先生自是書啟往復無虛時其賜
教有曰闔門忠義爲百世光華先生謝云惟當克己慎
行益厲夙心體國忠君不負所學丙子考文京府戊寅

高皇帝賓天皇孫嗣位召爲翰林博士己卯陞侍講命
考文京府庚辰復司會試一時君臣道合有大制作若
省躬殿銘凝命神寶頌御史府記東甌王神道碑銘皆
出先生手是時海宇謐靖幽州兵起先生憂國追惟劉
中丞基爲之淚下未幾天命有歸先生以死殉君至於
夷滅不變上距宋太史公惜別時適二十餘年矣知德
之深知言之至至是信哉爲文雄邁醇深所著述有基
命錄武王戒書訓釋周易枝詞十餘卷宋史要言起太
宗盡哲宗凡十卷今皆不存所存周禮辨疑宗儀雜箴
雜戒深慮公子問對釋統上中下等篇然當時有禁又
五十年鄉之儒紳始蒐輯成帙鋟梓以傳南安守華亭

張弼題其卷後曰篤信好學守死善道宇宙之間僅見此老九原有知亦足以少慰也夫子小子景仰先哲直以甲子書其所信者以示不忘

弘治己酉五月朔

台學源流

明臨海金賁亨字一所撰

方遜志名孝孺字希直寧海人父克勤號愚菴好古嗜學研究羣經及濂洛關閩遺書尋鄉先達授受源委精思力索而允蹈之慨然以爲不合天人以爲學非學也嘗爲濟寧守以風化爲急府庭之閒不陳桎械其政績名一時云先生侍父宦遊歷齊魯之墟覽周公孔子廟宅問陋巷舞雩所在慨然有願學之志旣而從潛溪宋景濂遊潛溪見其文深器之名流老輩皆推讓弗及識

者以爲大類蘇氏而正論過之先生末視文藝恆以明
王道闢異端爲己任嘗曰不以伊周之心事其君賊其
君者也不以孔孟之學爲學賊其身者也謂道之於事
無乎不在因列所當勉者爲二十一箴又作雜戒三十
八章以自警謂化民必自正家始作宗儀九章家人箴
一十五首以告其族人謂先王之治先德教而後政刑
作深慮十道謂簒臣女后夷狄雖一天下不可爲正統
作釋統三篇其言多先哲所未發者又自悼空言浸多
絕無自得之味思一屏絕之而以顏曾所以自治者治
其心爲日稍久覺向時過闕愈眾其論靜則本於無欲
謂能無欲雖手執筆而耳聽訟口斷曲直而目察銖兩

中之寂然者未嘗少變也其論敬以操而不失則內直
內直則外方者在是而聖人之天德可庶幾而至矣其
論攻異端如攻病當追求其本魁然鉅夫非自耗其元
氣病何由入之善養者當補元氣元氣既完卽病易去
耳其進修所詣月異而歲不同見者咸以爲程朱復出
嘗臥病絕糧家人以告先生笑曰古人有三旬九食瓶
無儲粟者奚獨我哉洪武中以薦召至京上見其舉動
端肅謂皇太孫曰此莊士也當老其才以輔汝授漢中
教授蜀獻王處以賓師曰方先生古之賢者也爲更其
號稱正學先生云後爲翰林博士尋進侍講革除之際
與練子寧等不屈而死年四十有七文廟嘗與楊榮論

子寧等曰使子寧今日在此朕固當用之爾仁廟亦謂
宰執曰方孝孺輩皆忠臣也詔從寬典鄉縉紳始刻其
遺文四十卷後刪定爲二十四卷邑令郭紳爲立祠祀
之其所著周易枝詞周禮考次目錄武王戒書註宋史
要言基命錄文統皆不傳

見蘇平仲文集潛溪集天順
口錄備遺錄革除遺事錄遜

志齋集郡
志尊鄉錄

棻按明史太祖謂皇太子曰此莊士當老其才在洪
武十五年壬戌越十年壬申四月太子薨九月以方
孝孺爲漢中教授今以莊士云云爲在壬申之歲故
以爲謂皇太孫誤矣又云更其號稱正學先生後爲
翰林博士年四十七俱誤先生生於至正丁酉至建

文王午年四十六耳

赤城新志方孝孺字希直號遜志幼時從其父濟寧公
北遊歷齊魯之故墟覽周公孔子之廟宅求七十子之
遺跡潛心靜慮驗其所得慨然以爲縱顏閔未可幾及
若樊遲冉求輩使學之同時豈遽讓之但世無孔子不
得所依歸爾蓋其道德文章出乎天性弱冠日讀書積
寸五經百家皆已醞釀下筆翩翩盡聖賢膏腴從宋太
史公游公所收皆天下名士一見深驚異之以爲莫之
與京洪武中被召爲漢中教授歲壬午以翰林侍講卒
於官所著有遜志齋稿二十八卷太史公稱齊寧之學
謂自晦庵文公紹伊洛之正緒傳道而受業者幾徧大

江之南而台爲極盛流風遺韻迄今猶未泯若濟寧守
方公其殆聞而知之者與蓋其學實本之家庭益擴而
大雖功業不究而道德文學識者以爲當代一人云

文學博士方先生傳

海鹽鄭曉室甫撰

吾學編

先生諱孝孺字希直一字希古台寧海人父克勤元末
隱居國初守濟寧有惠政孝孺幼精敏絕倫雙眸炯炯
日讀書積寸爲文雄邁醇深鄉人呼爲小韓子年十四
五侍父宦遊齊魯閒歷覽孔子周公廟宅問陋巷舞雩
所在從宋濂遊同門多天下名士一旦盡出其下先輩
如胡翰蘇伯衡皆自謂弗如孝孺顧末視文藝恆以明
王道闢異端爲己任世咸以爲程朱復出嘗臥病絕糧

家人以告笑曰古人三旬九食窮豈獨我哉洪武十五

年以吳沈揭樞薦召見上喜其舉動端整謂皇孫曰

按當

作皇太子此莊士當老其才以輔汝遣還鄉會仇家得罪詞

連孝孺籍其家械送闕下上識孝孺名特開釋令奉祖

母挈妻子還二十五年又薦召至上曰今非用孝孺時

稍擢漢中府學教授日與諸生講聖學蜀獻王聞其賢

聘爲世子師孝孺每見必陳說道德王喜甚講經論文

無虛日名其讀書之廬曰正學皇太孫卽位廷臣交薦

召爲翰林博士進侍講尋陞侍講學士侍經筵備顧問

孝孺德望素隆一時倚重凡將相大政大議輒咨孝孺

上好讀書每有疑卽召使講解臨朝奏事臣僚面議可

否必命孝孺就展前批荅孝孺嘗作詩曰斧屐臨軒几
視閒春風和氣滿龍顏細聽天語揮毫久攜得香煙兩
袖還又曰風輒彤庭尙薄寒御爐香遶玉闌干黃門忽
報文淵閣天子看書召講官時大延名儒修太祖實錄
及類要諸書孝孺爲總裁會改謹身殿名正心孝孺獻
銘作凝命神寶孝孺又獻頌皆用以規正君德比定官
制改孝孺爲文章博士靖難兵起日召謀議詔檄皆出
孝孺手兵旣渡淮及江上畫策堅守誓死社稷建文君
遜去文皇以姚廣孝言召用孝孺不肯屈繫獄一日遣
諭再三終不從又詔孝孺草詔一見悲慟聲徹殿陞上
降榻勞曰先生無勞若余欲法周公輔成王耳孝孺曰

成王安在文皇曰渠自焚死孝孺曰成王卽不存何不
立成王之子文皇曰國賴長君孝孺曰何不立成王之
弟文皇曰此朕家事先生無過勞苦目左右授筆札又
曰詔天下非先生草不可孝孺大批數字云云投筆於
地又大哭且罵且哭曰死卽死詔不可草文皇大怒命
磔諸市孝孺慨然就戮爲絕命詞曰天降亂離兮孰知
其由姦臣得計兮謀國用猶忠臣發憤兮血淚交流以
此殉君兮抑又何求嗚呼哀哉兮庶不我尤時年四十
六復詔收其妻鄭鄭先已經死宗族坐死者八百七十
三人孝孺和粹貞諒事親孝處師友篤恩義克勤守濟
寧被誣謫戍江浦上書乞以身代父不報宋濂葬夔州

孝孺自漢中走荆榛往祭且言之蜀王軫恤其孤備至
與林右王紳郭潛劉浩葉見泰王叔英諸名士友善切
磨道義被薦時王叔英與書大率以時措之宜爲言孝
孺深然之及柄用輒慕古王政卽欲見諸行事其文章
大類蘇氏而正論過之嘗謂道之於事無乎不在列爲
三十八箴又作雜誠三十八章以自警謂化民必自正
家始作宗儀九篇謂先王之治先德化而後政刑作深
慮論十首以篡臣女主夷狄雖一天下不可爲正統作
釋統三篇多先哲所未發者四方夷裔得一字寶於金
壁所著有遜志齋集四十卷又有周禮考次大易枝辭
武王戒書註帝王基命錄文統宋史要言諸書逸不傳

洪熙初仁廟嘗謂羣臣曰若孝孺輩皆忠臣詔姦臣黨
與從寬典方氏遺族始有赦還鄉者因立祠堂祀孝孺
成化初遺文始行或云錄孝孺家時得魏典史澤周旋
藏其幼子以故孝孺尙有後謝文肅公詩所謂孫枝一
葉是君恩是也孝孺死節事至今百六十年人皆厯厯
能言雖言人人殊其成仁取義之死靡悔斷然不可泯
滅而同時文學柄用之臣際會功名史有別書以故彭
惠安公哀江南詞有曰後來姦佞儒巧言自粉飾扣頭
乞餘生無乃非直筆澤字彥恩應天人爲刑部尙書謫
寧海

儒林錄方正學先生名孝孺字希直一字希古浙江寧

海人幼精敏雙眸炯炯讀書以寸爲日人呼小韓子年
十四侍父宦遊齊魯閒歷覽孔子周公廟宅問陋巷舞
雩所在慨然歎曰使吾遊孔門顏閔縱未可幾及其餘
若樊遲冉有輩豈皆讓之耶但世無孔子不得依歸耳
年二十遊京師從學於太史宋潛溪先後凡六載盡傳
其學直以聖賢自任一切世俗之事皆不關懷友朋以
文詞相問者謂文不足爲必告以道入道之路莫切於
公私義利之辨念慮之興當靜以察之舍此不治是縱
盜於家無可爲力矣其言周子之主靜主於仁義中正
則未有不靜非強制其本心如木石然而不能應物也
故聖人未嘗不動謂聖功始於小學作幼儀二十首謂

化民必自正家始作宗儀九篇謂王治尙德而緩刑作
深慮論十篇謂道體事而無不在列雜誠以自警持守
之嚴踐履之篤真堪與紫陽相伯仲時人以爲程朱復
出嘗臥病絕糧家人以告先生曰古人有三旬九食甑
無儲米者豈獨我哉洪武十五年吳沉薦召帝稱莊士
二十五年交薦授漢中府教授蜀獻王聘爲世子師名
其讀書之廬曰正學建文帝卽位召爲翰林博士進侍
講學士帝有疑問不時宣召使講解君臣之間同於師
友臣寮奏事命就展前批荅相與講論周官法度於是
品官階勳改如周禮卿大夫士之制靖難兵起詔檄皆
出先生手齊黃雖用事急輒倉皇失職先生能盡奇策

閒燕王父子燕王幾殺其世子燕兵渡江力勸帝固守
京城以待四方之援不聽時齊黃出走先生獨留宮中
火先生服斬衰哭臨於家初文皇南下姚廣孝啟曰孝
孺必不降幸勿殺殺此天下讀書種子絕矣文皇入召
之不至使其門人廖鏞廖銘往先生怒曰汝讀書幾年
不識一是字耶兩子復命遂使人繫置獄中及革卽位
詔蓋文皇旣負慚德欲得先生筆以塞天下之口服天
下之心及召至哭聲徹殿陛文皇降榻勞曰先生無勞
苦余欲法周公輔成王耳先生曰成王今安在文皇曰
渠自焚死先生曰成王卽不存何不立成王之子文皇
曰國賴長君先生曰何不立成王之弟文皇曰朕家事

先生無過勞苦命左右授筆札曰詔天下非先生草不可先生投筆大哭曰吾腕可斷筆不可枉文皇大怒曰汝能遽死耶朕當滅汝十族仍繫獄中每抄提輒示先生使先生知交友門生戮殆盡先生不從乃磔於市先生慨然就刑年四十六妻鄭及子女先經死連坐死者八百七十三人廖二子拾先生遺骸葬聚寶門外亦見收論死是時溧水尙書魏澤謫寧海典史藏其幼子德宗於雲間門人俞允家招贅卹孤師門再造以故先生今猶有後先生真諒剛毅尤驚人倫其學得之家庭而淵源於伊洛文章類蘇氏而正論過之所著有周禮考次大易枝辭武王戒書注帝王基命錄宗儀九篇嚴誠

宋史要言文統遜志齋集若干卷行世南渡諡文正

明儒學案方孝孺字希直台之寧海人自幼精敏絕倫
八歲而讀書十五而學文輒爲父友所稱二十遊京師
從學於太史宋濂濂以爲遊吾門者多矣未有若方生
者也濂返金華先生復從之先後凡六歲盡傳其學兩
應召命授漢中教授蜀獻王聘爲世子師獻王甚賢之
名其讀書之堂曰正學建文帝召爲翰林博士進侍讀
學士帝有疑問不時宣召君臣之間同於師友金川失
守先生斬衰哭不絕聲文皇召之不至使其門人廖鏞
往先生曰汝讀幾年書還不識箇是字於是繫獄時當
世文章共推先生爲第一故姚廣孝嘗屬文皇曰孝孺

必不降不可殺之殺之天下讀書種子絕矣文皇旣慚德此舉欲令先生草詔以塞天下之人心先生以周公之說窮之文皇亦降志乞草先生怒罵不已磔之聚寶門外年四十六坐死者凡八百四十七人崇禎末諡文正先生直以聖賢自任一切世俗之事皆不關懷朋友以文辭相問者必告之以道謂文不足爲也入道之路莫切於公私義利之辨念慮之興當靜以察之舍此不治是猶縱盜於家其餘無可爲力矣其言周子之主靜主於仁義中正則未有不靜非強制其本心如木石然而不能應物也故聖人未嘗不動謂聖功始於小學作幼儀二十首謂化民必自正家始作宗儀九篇謂王治

尚德而緩刑作深慮論十篇謂道體事而無不在列雜
誠以自警持守之嚴剛大之氣與紫陽真相伯仲固爲
有明之學祖也先生之學雖出自景濂氏然得之家庭
者居多其父克勤嘗尋討鄉先達授受原委寢食爲之
幾廢者也故景濂氏出入於二氏先生以叛道者莫過
於二氏而釋氏尤甚不憚放言驅斥一時僧徒俱恨之
庸人之論先生者有二以先生得君而無救於其亡夫
分封太過七國之反漢高祖釀之成祖之天下高皇帝
授之一成一敗成祖之智勇十倍吳王濞此不可以成
敗而譽咎王室也況先生未嘗當國惠帝徒以經史見
契耳又以先生激烈已甚致十族之酷夫成祖天性格

薄先生爲天下屬望不得其草則怨毒倒行何所不至
不關先生之甚不甚也不觀先生而外其受禍如先生
者寧皆已甚之所至乎此但可委之無妄之運數耳蔡
虛齋曰如遜志者蓋千載一人也天地幸生斯人而乃
不終祐之使斯人得竟爲人世用天地果有知乎哉痛
言及此使人直有追憾天地之心也乃知先正固自有
定論也

明儒學案師說

黃宗羲述

方正學孝孺

神聖既遠禍亂相尋學士大夫有以生民爲慮王道爲
心者絕少宋沒益不可問先生稟絕世之資慨焉以斯

文自任會文明啟運千載一時深維上天所以生我之意與古聖賢之所講求直欲排洪荒而開二帝去雜霸而見三王又推其餘以淑來禩伊周孔孟合爲一人將旦暮遇之此非學而有以見性分之大全不能也旣而時命不偶遂以九死成就一個是完天下萬世之責其扶持世教信乎不媿千秋正學者也考先生在當時已稱程朱復出後之人反以一死抹過先生一生苦心謂節義與理學是兩事出此者入彼至不得與揚雄吳革廬論次竝稱於是成仁取義之訓爲世大禁而亂臣賊子將接踵於天下矣悲夫或言先生之忠至矣而十族與殉無乃傷於激乎余曰先生只自辦一死其激而及

十族十族各辦其一死耳普天之下莫非王土十族眾
乎而不當死乎惟先生平日學問斷斷乎臣盡忠子盡
孝一本於良心之所固有者率天下而趨之至數十年
之久幾於風移世變一日乃得透此一段精光不可掩
遏蓋至誠形著動變之理宜然而非人力之所幾及也
雖謂先生爲中庸之道可也

欽定勝朝殉節諸臣錄

文學博士方孝孺寧海人嘗從宋濂學蜀獻王聘爲世
子師名其讀書之廬曰正學建文初有大政事輒咨之
燕兵起廷議討之詔檄皆出其手燕王陷京師逼草登
極詔哭罵不屈磔于市弟孝友亦死妻鄭氏二子中憲

中愈俱自經二女投秦淮河死

見明史及輯覽

方孝孺通經勵行取義成仁無負平生洵稱儒者諡忠

文

右建文殉節諸臣專諡

正學齋記

金華王紳仲指撰

遜志外紀上

漢中府教授天台方公希直備神明之資負正大之學慨然有志於聖賢者也蜀王殿下素加禮敬閒嘗聘置左右以咨諏正道公見必以仁義道德之言陳於前王方大肆力於緝熙之學日以誠意正心躬脩體驗爲務與公論辯若律呂之諧肯綮之中無不脗合王愈加斂容納之與臣下言必曰方公今之賢者也遂賜名其讀

書之齋曰正學期其底聖賢也公退以告于紳紳聞三代之隆大道昭著風俗淳厚人倫明於上教化行於下故人之學焉者多出於正周衰列國分爭人尙詭異各負知能自立門戶而異端之術競起矣若楊墨之爲我兼愛老聃莊列之虛無張儀蘇秦之縱橫韓非申不害之刑名管仲晏嬰之事功有不能枚舉者逮至漢唐世愈降而道愈漓著書動以百計其爲說必曰我著書所以明斯道也而道卒不加明我立言所以開人心也而人心終不加古非徒無益於人其所以壅塞正途瞶盲耳目者爲甚大天下之士莫不隨波逐流而相上下其於聖賢之道遂若歧逕之異趨矣比之三代之學其邪

正爲何如哉尙幸閒有豪傑之士出於其閒足以回人心破邪說挽頽波而振餘風然亦不能多見若漢之董仲舒其言明白坦易爲得聖賢之心唐之韓愈卓乎獨立於百世之下皆閒世之奇才也至宋周茂叔以灑落之懷得理奧於默契心融之妙及其門者若二程子之主敬行恕窮神知化而道益宏遠矣其後新安朱子出又能推明周程之旨而集羣賢之大成於是世之先後雖不同要皆羽翼斯道而所學純乎其正者也故自三代之下論者莫先於宋有元之時若許衡氏若吳澄氏若許謙氏輩彬彬和附于下者蓋莫非朱子之傳嗚呼上下千數百年求其人僅僅如此而邪說之惑人反有

過之則夫凌高駕虛勵志鼓勇而跌足於異途者可勝
道哉此志士仁人所以扼腕而深悲也今公才足以振
俗德足以服人逢聖明之世而又遭遇賢王之眷顧
則所以追諸子而邇三代者公其可無意乎紳識志卑
淺於公之學無能爲役幸嘗辱知於公最久故敢竊公
之餘論以釋睿念之萬一苟以爲然則繼今以往益圖
軌轍以爲御焉

送方教授還漢中序

王紳

成化集本附錄

立志而期底於聖人出言而能傳於後世此士之所當
然而爲學之所當勉焉者也蓋士之爲學不以高大自
期則立志不遠不以斯道自任則出言無補於世自昔

大賢君子所以德脩而名不磨者以此也人徒知其道
尊業盛如景星慶雲麗乎重霄之上紫芝朱草挺乎眾
卉之中見者爲之咨嗟聞者爲之景慕下至兒童走卒
莫不有所歆羨焉所以得於人者亦已重矣而其心之
所存固不在此也若是者其教授希直方先生乎先生
天台人也自幼知尙其志凡立言著述非關世教之語
不形於文翰年甫弱冠聲譽已播於縉紳閒國初大老
如太史潛溪宋公教授長山胡公卽以斯文之任爲屬
迄今德性凝定年益壯而業益成所謂屬於其躬
原作窮誤
者若固有之非若世之章甫其冠逢掖其衣而聲聞過
情者比也然則垂棘乎尹照乘灼爍不足以比先生之

德五采雜施十日並照不足以喻先生之文惟夫學顏
子之學志伊尹之志孜孜於博文約禮之功而思致其
君爲堯舜之君澤其民爲堯舜之民乃其素志而士亦
以此望於先生也甲戌之春以蜀府召命至成都賢王
虛已待之先生日推其所學陳于前王與臣下言必稱
先生爲賢者先生益感知遇之深視義理之精微性命
之玄奧知無不言言必中節及承教旨有所述作尤研
精覃思必歸於正而後已若先生者可謂閒世之英才
士林之宗主矣然其道豈止於一身哉乃邦國之華也
紳也辱先生之知最深且久於其還也士友咸賦詩爲
餞故紳特明其志述其學而爲之序云

送方生還天台詩有序

金華宋濂潛溪撰

嘉業堂刊

古者重德教非惟子弟之求師而爲師者得一英才而訓飭之未嘗不喜動顏色此無他天理民彝之不能自已也予以一日之長來受經者每有其人俞皆散落四方黍稷雖芘芘不如稊稗之有秋者多矣晚得天台方生希直其爲人也凝重而不遷於物穎銳有以燭諸理閒發爲文如水湧而山出喧啾百鳥中見此孤鳳皇云胡不喜越一年別去感慨今昔又云何弗思退朝之暇懸燈默坐因發於聲詩一十四章以送之末章用來字者冀負笈重來以迄於有成也詩曰

北風何逶迤雪花大於手之子有遠役忍勸尊中酒

念子初來時才思若蘭絲抽之已見緒染就五色衣
被之行儒林孰不生豔慕蹉蹉媚學徒三步一回顧
余生老且至秋髮垂兩肩得之喜欲舞如獲寶珞然

按珞

當作珞

素編耽清晝青鐙坐深夜探玄欲忘腹薦味如啖蔗
一朝別我去何以釋離憂不禁秦淮水流子江上舟
但願逆風起吹舟不得往共穿鍾阜雲時看白石長
風本無情物豈能知我心事既不得諧贈言如贈金
須知九仞山功或少一簣學貴隨日新慎勿中道廢
羣經耿明訓白日麗青天苟徒溺文辭螢爝欲爭妍
姬孔亦何人顏面了不異肯墮盆盎中當作瑚璉器

不見金谷園瓊芳委塵沙泰山有喬松老幹凌蒼霞
四海皆兄弟知己獨難遇伯樂尙不逢鹽車厄騏驥
明年二三月羅山花正開登高日盼望遲子能重來

洪武九年冬十一月書于蘿山石室精舍

送希直歸寧海五十四韻有引

宋濂

洪武丙辰予官禁林寧海方生希直以文爲贄一覽輒
奇之館賓左右與其談經歷三時乃去明年丁巳予蒙
恩謝事還浦陽生復執經來侍喜動于中凡理學淵源
之統人物絕續之紀盛衰幾微之載名物度數之變無
不肆言之離析於一絲而會歸於大通生精敏絕倫每
麤發其端卽能逆推而底于極本末兼舉細大弗遺見

於論著文義森蔚千變萬態不主故常而辭意濯然常
新袞袞汨汨未始有竭也細占其進修之功日有異而
月不同僅越四春秋而已英發光著如斯使後四春秋
則其所至又不知爲何如以近代言之歐陽少師蘇長
公輩姑置未論自餘諸子與之角逐於文藝之場不知
孰爲後孰爲先也今爲此說人必疑予之過情後二十
餘年當信其爲知言而許生者非過也雖然予之所許
生者寧獨文哉庚申之秋生以不見大母者久將歸省
焉予深惜其去爲賦是詩旣揚其素有之善而復勗以
遠大之業云詩曰

昔在辭垣時英才常駿奔水碧與金膏價重駭見聞終

然無根蒂斂散空中雲方生海上來玉竝而春溫袖攜
絺繡書面帶黼黻文揖遜入禮域陳義凌秋旻同飡太
倉粟共勘典與墳潛深索幽邃穹高攀嶙峋踏雪忽言
別涉險航江津梅花侶相憐沿途慰孤貧湛恩來九天
憫我髮如銀特勅還故山許與煙霞親生聞抱經來處
此寂寞濱滂蒼扣無始溟滓窮無垠宇宙所管攝載籍
所敷陳終始鉤鉗之若大樂建鈞律呂按高下宮商肅
君臣鬯和免憊懣疊奏歸繹純桑濮咲麾斥淫哇竟何
存黃鍾壓瓦釜庭燎滅鬼燐侶茲稽古力可敵哉定勛
濡毫寫雄顥勢足移峨岷漏泄渾沌竅出入造化神變
幻波起伏清溫玉嶙峋盡抽神奇祕不墮臭腐塵所以

日出之愈見光景新山鬼當灑泣湘靈且逡巡振古著
作家後先各繽紛豈知萬毛牛難媲一角麟古今二千
載有如星在晨豈意瓦礫中見此席上珍予生髮未燥
立言鄙何份結交一世士暮齒越七旬妍媸與苦良入
目無留痕自非病狂藥顛倒甲與穉寧因一學徒諛辭
浪云云大言心不忤祇爲所見真生今省行期序飲松
竹根笑摘黃金花起泛青瑤尊酒酣兩耳熱劇論如抽
繯寧無贈別言有志須當遵眞儒在用世毋徒滯彌文
文繁必喪質適中迺彬彬有虞號多士九官展經綸惟
時亮天工外夷悉來賓不聞有著書鼓蕩摩乾坤生乃
周容刀生乃魯璠道眞器乃貴奚須用空言華華務

踐形勿負七尺身敬義以爲衣忠信以爲冠慈仁以爲
佩廉知以爲輦特立睨千古萬象昭無昏此意竟誰知
爲爾言諄諄毋徒謂強聒一一宜書紳

洪武十三年庚申秋九月吉日

先生與趙伯欽書云太史公示予此詩未嘗以示人
蓋以其知者少故也今特錄寄吾兄前輩勉後學倦
倦之意不特在乎文辭而已望相與勉之

按遜志外紀有林公輔葉見泰郭潛跋俱散見各卷

遜學方先生贊

黃巖謝鐸鳴治撰尊鄉錄節要一
按稱遜學者蓋合遜志正學而並稱之

我台之學考亭是師逮于愚菴實聞而知愚菴之子是
曰遜學益擴而弘上泝伊洛如麟在藪如星在晨旁觀

一世絕類離倫潛溪之門盡天下士驚咤起立謂莫敢
比心實希聖自視歆然銘盤書紳雜誠惓惓家人有箴
宗儀有紀謂道之行莫先於此學以氣充磅礴四行孰
顧孰忌禍福死生迄宋歷元士氣益下有復古初不在
作者

從祀文廟奏議

孫刻本附錄

禮部謹奏爲遵

旨議奏事同治二年四月二十二日

內閣鈔出十八日奉

上諭給事中王憲成奏請將明

儒方孝孺從祀學宮一摺著禮部議奏等因欽此欽遵
到部據原奏內稱方孝孺昌明正學躬行實踐其事實
具詳明史本傳其著作具詳所著文集黃宗羲稱其致

命遂志得中庸之道與激烈殉節者不同恭讀 高宗
純皇帝御批通鑑輯覽曰及至身臨鼎鑊而抗詞直斥
侃侃不撓未嘗少降其志凜然大節洵爲無忝綱常正
未可以其謀事之不成而概加吹求 聖諭煌煌允爲
千古定論謹按朱子之道傳授黃幹幹傳何基基傳王
柏柏傳金履祥履祥傳許謙謙傳宋濂濂傳孝孺查黃
幹及金華四子久經從祀文廟而孝孺學術精純足爲
師表與從祀之典相符等語臣等伏查道光十九年奉
上諭先儒升祔學宮祀典至鉅必其人學術精純經
綸卓越方可俎豆馨香用昭崇報等因欽此茲查明史
列傳方孝孺寧海人幼警敏讀書日盈寸長從宋濂學

恆以明王道致太平爲己任洪武二十五年以薦召除漢中府教授日與諸生講學不倦蜀獻王聞其賢聘爲世子師每見陳說道德王尊以殊禮名其讀書之廬曰正學及惠帝卽位召爲翰林侍講國家大政事輒咨之帝好讀書每有疑卽召使講解燕兵起廷議討之詔檄皆出其手燕兵入成祖欲使草詔孝孺投筆于地慨然就死孝孺工文章醕深雄邁每一篇出海內爭相傳誦門人王稔錄爲緱城集故後得行於世又查四庫全書總目有遜志齋集二十四卷明儒學案稱其以聖賢自任一切世俗之事皆不關懷謂入道之路莫切於公私義利之辨謂聖功始於小學作幼儀二十首謂化民必

自正家始作宗儀九篇謂王治尚德而緩刑作深慮論
十篇謂道體事而無不在列雜誠以自警持守之嚴剛
大之氣與紫陽真相伯仲固爲有明之學祖則其學術
精純可見其居官也以明王道致太平爲已任及靖難
兵起力排眾議誓守社稷卒能致命遂志全節完名是
以康熙四十四年 聖祖仁皇帝賜以忠烈明臣匾額
高宗純皇帝御批通鑑輯覽稱其大節凜然無忝綱
常則其經綸卓越可見歷代之論孝孺者明太祖稱爲
莊士蜀獻王目爲正學姚廣孝謂爲天下讀書種子蔡
清謂爲千載一人而黃宗羲師說列孝孺于有明諸儒
之首嘗私議其當從祀孔庭是方孝孺學術經綸久有

定論數與歷年從祀學宮成案相符臣等公同商酌擬
如該給事中所請准以明儒方孝孺從祀文廟再祀典
次序現奉 諭旨繪圖頒祭臣等當詳細查覈另行具
奏其方孝孺從祀之處如蒙 俞允再行按次增入繪
圖恭呈 御覽所有臣等覈議緣由是否有當伏乞
皇太后 皇上聖鑒 訓示遵行爲此謹奏同治二年
五月二十二日奏本日奉 旨依議欽此

白學統三十

性理十八

五

吳興劉氏

嘉業堂刊

白學統卷三十